

21/10/2003

Seminar bincang sumbangan Dr M

BATU PAHAT: Satu seminar khas membincangkan sumbangan Perdana Menteri, Datuk Seri Dr Mahathir Mohamad, termasuk terhadap pembangunan Islam akan diadakan di Pusat Latihan Teknologi Tinggi (Adtec), di sini pagi Sabtu ini.

Program bertajuk `Dr Mahathir Pemikir Islam Abad Ke-21' dianjurkan Jabatan Hal Ehwal Khas (JHEK) Johor dan akan berlangsung di Dewan Adtec, Jalan Tanjung Laboh, mulai jam 8.30 pagi hingga 4.30 petang.

Pengarah JHEK Johor, Dr Gunawan Mahmood, berkata tujuan utama seminar adalah bagi mengenang perjuangan Perdana Menteri yang memimpin negara selama 22 tahun.

Beliau yang juga pengerusi seminar, berkata seminar itu dapat melihat kembali sumbangan Dr Mahathir sebagai pencetus idea baru pada abad ini yang bukan saja di Malaysia, malah seluruh dunia.

"Program ini akan turut meneliti pemikiran dan wawasan Perdana Menteri terhadap Islam sebagai sumber kekuatan memajukan bangsa, negara dan umat Islam seluruh dunia.

"Selain itu, seminar juga bertujuan meletakkan Dr Mahathir sebagai pemikir Islam abad ini setaraf pemikir agung, Jamaluddin Al-Afghani, Muhammad Iqbal dan Muhamad Abduh," katanya.

Gunawan berkata, sebanyak empat kertas kerja dibentangkan oleh tiga tokoh Universiti Kebangsaan Malaysia (UKM) dan seorang dari Institut Kefahaman Islam Malaysia (Ikim).

Penceramah dari UKM ialah Dekan Fakulti Pengajian Islam, Prof Zakaria Stapa; Prof Madya Dr Faisal Othman dari Jabatan Usuluddin dan Dr Nik Anuar Nik Mahmud dari Pusat Pengajian Sejarah, Politik dan Strategik, Fakulti Sains Sosial dan Kemasyarakatan.

Seorang lagi pembentang kertas kerja ialah Nor Azaruddin Husni Nuruddin dari Institut Kefahaman Islam Malaysia (Ikim).

Beliau berkata, seminar dijadual dirasmikan Pengerusi Jawatankuasa Pendidikan dan Guna Tenaga, Belia, Sukan dan Kebudayaan negeri, Ahmad Zahri Jamil.